

欽定剿平粵匪方略

欽定勦平粵匪方略卷一百四十六 丙辰年

二月初三日

辛卯

軍機大臣吏部刑部會奏言遵

旨會議御史李鶴年奏稱用兵省分月選及揀發人員  
無不視爲畏途延不赴任至

特旨簡放人員或藉團練爲名逗留原籍或稱有經手  
未完事件保留本任等語查軍興以來凡月選  
揀發分發應行赴任赴省人員有經本籍及經

過地方各督撫大臣留營差委或留辦團練防堵等事僅係咨部覈辦者吏部俱經議駁惟專摺奏明者始行遵辦況

特旨簡放及月選各員均係實缺該員等如果經濟素優正當迅速赴任整理一切若徘徊中路到處逗留是其心懷畏避已可概見至揀發分發人員雖非實缺亦應速赴本省以供驅遣相應請

旨飭下統兵大臣及各省督撫查明從前奏留各員已  
經著有勞績保奏有案者仍准留於該處差委  
外其無勞績者俟接到此次部文卽行分別勒  
限飭赴本省本任不得以現有經手事件爲詞  
仍一面報部查覈嗣後無論月選揀發分發及  
特旨簡放之員均令依限赴省赴任概不准經過地方  
留辦團練等事至推升用兵省分人員應行引

見赴任者如原省並無軍務尤不准奏留展限如有藉  
詞奏請者均由吏部查明奏駁並將該督撫大  
臣議處本員如有逾限情事仍照例辦理又據  
稱失守城池罪名甚重請

飭各督撫仍照例審擬罪名不得巧爲開脫等語查州  
縣失守城池定例甚嚴辦理無虞輕縱惟近來  
州縣於賊至之先往往藉稱山城堵禦賊去之

後又稱帶兵收復實屬巧爲避就請嗣後失守  
城池之員仍照本例定擬必實係禦賊打仗身  
受重傷或真能督率兵勇隨同收復者方准聲  
敘可原情節據實奏明請

旨辦理不得概以功過相抵爲詞遽爲開脫又據稱外  
省遇有查辦叅員之案往往含糊了事如安徽  
知州繡綸河南道員周煦徵劣蹟昭著該撫旣

爲消弭罪案又爲保全功名請

申諭該撫察看各該員果能痛改前非再出具切實考  
語保留本省此後如有貪鄙劣蹟卽治該撫以  
濫保匪人之罪等語查繡綸前在山東滕縣知  
縣任內諱盜革職照例應卽回旗所有該御史  
奏請

飭令該撫出考保留之處應毋庸議河南道員周煦徵

因被人糾叅劣款經巡撫英桂奏請撤任會同  
河道總督李鈞審明被叅各款並無其事擬請  
留豫另補茲該御史奏令該撫悉心察看再出  
具切實考語保留本省係爲整飭吏治起見應  
如所奏請

旨飭下該撫遵照辦理奏入

上諭內閣曰向來月選揀發分發各員原應依限赴省



赴任乃近來用兵省分揀發人員往往經本籍及經過地方督撫大臣留營差委或留辦團練防堵等事甚至特旨簡放之員亦復觀望徘徊延不赴任似此規避取巧以致員缺久懸尙復成何事體著各省統兵大臣及各該督撫等查明從前奏留各員如有已著勞績保奏有案者仍准留於該處差委其餘並無勞績者自奉旨之日爲始勒限飭赴本任本省不得

復行藉詞奏留仍一面報部查覈嗣後月選揀發分發人員概不准經過地方督撫大臣奏留差委其推升軍務省分人員應行引見赴任者如原省本無軍務尤不准奏留展限如有藉端奏請者卽著該部查明奏參至失守城池罪名綦重各省州縣賊至則稱出城堵禦賊去又稱帶兵收復紛紛開脫何以申法紀而肅官常嗣後失守城池各員仍著照本例定擬

罪名必實係禦賊接仗身受重傷或真能督率兵勇  
隨同克復城池情節實有可原者方准各省統兵大  
臣及督撫等奏明請旨不得概以功過相抵等詞曲  
爲開脫至前任河南開歸陳許道周煦徵被參各款  
雖據英桂查明並無實在劣蹟請仍留該省另補著  
送部帶領引見再降諭旨

六月  
甲午  
托明阿陳金綬雷以誠奏言瓜州之

賊因金陵逆黨大夥來援每日分股出巢意圖  
逃竄臣等日督馬步兵勇東西設伏相機攻剿  
正月十二十四十八等日該逆大股撲西路土  
橋另股撲東路虹橋官軍奮力截殺擊倒其前  
隊大旗復經副將英貴等麾兵左右衝出立將  
賊隊衝爲數段自辰至未殲賊一百五六十名  
餘逆敗遁十九日賊乘霧黑風狂暗撲我西路

圍牆經副都統德興阿督率兵勇火器齊發轟斃無數虹橋迤南賊甚猖獗英貴復帶隊馳往策應並派都司趙樹棠等分路進攻斃賊約數十名忽該處東南二勇營盤爲賊火箭射入立即延燒賊見營內失火撲回衝突英貴等急將各隊聯合短兵相接奮力兜截德通等復分馬隊夾攻賊衆大挫分路潰逃統計殲斃僞總制

一名賊匪三百餘名惟遊擊王永追賊中槍與  
把總陳玉彪同時陣亡伏乞

天恩交部從優議卹日來大雪迷漫累日不息現甫晴  
霽而曠野稻田一望泥濘急切不能進攻賊亦  
深匿不出容再設法與吉爾杭阿等商議南北  
會攻之策奏八

上諭曰瓜州賊匪屢次衝突英貴等分投截剿尙屬奮

勇惟賊出可以接仗賊退卽無法進攻徒作焦急之  
言以掩遷延之咎何日方可奏功且屢傷勇弁甚屬  
可惜卽如王永人頗去得前經訥爾經額保舉曾蒙  
召見朕不知者尙不知凡幾托明阿等日久無功不  
過時閱數旬敷衍入奏殊失朕委任之心汝等自返  
能無愧乎

上命軍機大臣傳諭托明阿陳金綬雷以誠曰瓜州藁

爾之區被賊占踞托明阿自督師以來總未實力進  
攻以致久稽克復卽如正月十四十九等日之戰皆  
係賊匪前來撲營勉強開仗英貴等雖有斬擒而東  
南營盤被焚遊擊王永等陣亡實屬可惜且賊匪被  
擊退去官軍並未前往追勦並以連日大雪途多泥  
淖未能進攻爲詞似此懈弛遷延實堪痛恨現在南  
岸賊衆麕集竄擾意圖內犯情形極爲喫緊但能北



岸實力攻擊亦可稍分賊勢著托明阿等督飭水陸  
各軍迅速進剿務將瓜州賊巢剋日掃除毋再耽延  
致十咎戾

上諭內閣曰逆黨困踞瓜州伺隙撲竄經英貴等分路  
夾攻賊衆大挫潰逃著托明阿乘勝進攻毋再遷延  
所有力戰陣亡之遊擊王永把總陳玉彪均著交部  
從優議卹

同日向榮奏言官軍連日進攻三汊河等處賊  
壘該逆扼險相持未能得手賊遂分股由攔江  
舖竄至楊家壩陳莊一帶築壘嘯聚距倉頭鎮  
三四里查倉頭介於龍潭下蜀街之間乃我軍  
往來要道其內通句容丹陽各路旁竄尤屬可  
虞臣前已令余萬清妥籌兼顧並飛飭德安等  
前往會同堵禁正月十一日果有賊股竄越倉

頭經余萬清派兵將賊擊走斬殺數十餘人十  
二日余萬清會同總兵虎嵩林副將蔡應龍分  
路進剿該逆出拒我軍槍礮連環斃賊無數突  
有大股賊由上游繞出倉頭大路分撲我營余  
萬清等督兵分投抄殺奮力鏖戰擊殺執旗悍  
賊數十名賊衆敗退倉頭踞河密排槍礮十四  
日張國樑會同秦如虎督兵至丁家邊地方余

萬清等軍亦由下蜀街齊出攻勦虎嵩林蔡應  
龍等兵同時趕至將賊衝爲兩截俘斬無算該  
逆奔敗回巢張國樑復會同秦如虎於倉頭街  
後斃賊一百餘名適三汊河之賊潛出窺我營  
盤當卽撤隊回救逆匪遁去十五日總兵德安  
等揮兵直攻張楊村三汊河賊壘該逆出黨數  
千繼擁前來我軍槍礮齊施斃賊一百數十名

張國樑秦如虎復督兵分隊衝剿燒燬附近賊  
壘房屋連斬騎馬賊十餘名賊陣大潰惟賊壘  
濠寬築密槍礮排開難以得手伏思此次竄賊  
雖挫其鋒無如賊蹤愈竄愈前偏近腹地我軍  
自仙鶴門以至東陽龍潭下蜀街分屯百里兵  
方愈單而處處皆關緊要幾於剿不勝剿防不  
勝防前經臣咨商怡良吉爾杭阿調兵防守丹

陽以固蘇常要隘現在倉頭有賊則旬容又爲  
喫重且係大營後路復咨商添調官兵赴甸紮  
堵籌調水陸壯勇趕赴下蜀街一帶防勦並以  
蕪湖餘賊無多檄鄧紹良將兵勇暫交江長貴  
統領卽日酌帶勁兵數百名趕回金陵面商勦  
堵機宜並抽撥龍潭張玉良川兵馳往丁家邊  
協堵撤回張國樑至仙鶴門營盤調令遊擊李

鳴勳勇五百名移紮牌頭菴聯絡東陽龍潭以壯後路聲勢十六日倉頭石埠橋賊匪窺伺龍潭分股來犯勢甚兇悍經官軍四面攻剿轟斃不下三四百人同日余萬清虎嵩林兩面夾攻焚破韓家村賊壘一座十八日遊擊李定太等移紮顧家壩遇賊於施家村卽與余萬清派出各隊分投截剿連斬桀賊多名殲斃無數該逆

紛紛敗退追奔數里整隊撤回申刻復有大股賊匪由顧家壩進口竄越嚴巷一帶余萬清飛令李定太楊瑞乾等趕由六里店繞出亭子岡攔頭截擊該逆未敢前竄十九日黎明該逆已於顧家壩口築壘並分踞嚴巷各村四散擄掠查六里店前之夏家邊係旬容丹陽兩處要衝可堵賊旁通內犯之路特調令楊瑞乾等移至



夏家邊紮營相機截勦並派兵勇扼紮亭子岡  
以爲犄角另派兵填紮沿江各營與下蜀街互  
相聯絡以壯聲勢而防下竄先是臣聞逆竄嚴  
巷不勝憤恨適鄧紹良由蕪湖到魯臣與之面  
商機宜檄令統領下蜀街東陽龍潭諸軍於二  
十一日先赴龍潭布置周妥抽帶楚兵凱勇八  
百名連夜馳赴六里店會同余萬清速商勦堵

並帶去吉林黑龍江馬隊二百名咨商吉爾杭  
阿囑令京口副都統綱闕前往統帶助剿將調  
到之儀徵六合水勇分布高資下蜀街沿江地  
段並飭總兵明安泰由秣陵關馳往句容設防  
駐守以杜內犯此次陣亡之千總高啟榮防禦  
魁慶千總伍元慶三員並前在棲霞陣亡之把  
總雷萬年外委陳遇恩均能身先殺賊力戰捐

輿俱堪憫惜應請

旨飭部一併從優議卹奏入

上命軍機大臣傳諭向榮吉爾杭阿曰逆黨由洲地一路前竄急思內犯前據向榮奏自東陽以至龍潭下蜀街連營三十餘里堵扼周嚴並調下游戰船分泊高資一帶添調兵勇駐守丹陽業經諭令向榮等迅將棲霞石埠橋之賊併力剿擊毋令內竄乃覽本日

奏報三汊河賊壘尙未剷除而該逆已由攔江驛等處竄入倉頭鎮倉頭賊黨尙未擊退而該逆已由顧家壩竄越嚴巷是其內竄之路漸偏漸近且處處築壘以阻我軍聲勢若不併力急攻僅丹陽句容稍有疏虞全局何堪設想前此秦如虎欲過三汊河紮營而河北先爲賊踞該大臣令余萬清力扼倉頭而賊已先踞倉頭河岸李定太方欲由丁家邊進屯顧家

壘賊轉從顧家壩竄過嚴巷似此著著落後則雖稱  
夏家邊亭子岡等要隘均有屯兵亦屬有名無實此  
時江南北別無可以添撥之兵就該大臣現調兵勇  
計之爲數不少但能分投截擊將最悍之賊最堅之  
壘勦除一二處則賊鋒漸挫兵力自能施展著向榮  
吉爾杭阿嚴督鄧紹良等務將三汊河倉頭嚴巷等  
處賊壘悉數掃除應扼要隘萬不可再任該逆占踞

該大臣等不能迅克金陵鎮江遷延已甚若再不力圖扼截以致常州腹地復有震驚恐不能當此重罪也

上諭內閣曰賊匪屢出竄撲意圖內犯經官軍節次痛剿尙未能悉數殲除著向榮等嚴飭領兵各員迅速分投進攻務將沿江賊壘掃除淨盡毋稍玩延千總高啟榮防禦魁慶千總伍元慶把總雷萬年外委陳

遇恩身先士卒力戰陣亡殊堪憫惻均著交部從優  
議卹

十一日己亥曾國藩奏言撫臣文俊與臣函商前

以瑞臨偏近省垣決計先勦臨江周鳳山未經  
奉札之前陸軍在新淦縣水師在樟樹鎮中隔  
七十餘里兩軍不相聯絡周鳳山因撥岳炳榮  
等帶勇八百人回駐樟樹護衛水師詎臨江之

賊偵知官軍分支人數單薄遂由上游偷渡悍  
賊四五千入正月初二日來撲岳炳榮等營岳  
炳榮匹馬衝突十餘次奈衆寡懸殊漸退入營  
該逆層層包圍自卯至午火藥罄盡營盤被陷  
士卒傷亡二百餘人岳炳榮衝出重圍奔至豐  
城收集餘勇該逆乘間直上新淦冀撲周鳳山  
之營周鳳山亦率全軍折回樟樹初三日與賊



遇於瓦山地方該逆分爲六股周鳳山傳令各營先據山嶺紮營以高擊下自督都司臻國獻畢金科擊樹林之左兩股都司周岐山唐得陞擊樹林之右兩股參將阿達春都司李新華擊隄上兩股我軍奮不顧身衝入賊隊鏖戰逾時殺賊一千餘名賊衆敗竄各營奮追二十里又斃賊三四百名偪入河中死者無數生擒八十

餘名當初二日賊撲樟樹陸營之時水賊亦有  
戰船順流而下西岸又有陸賊二千人助之知  
府劉于瀆派千總李逢春等擊江中之賊舟余  
化南等擊東岸之陸賊吳步鼇等擊西岸之陸  
賊旋見旱營火起岳炳榮等陸兵失利劉于瀆  
自上戰船直前接應喊聲雷動分兩岸窮追賊  
船大小三十五號悉被我軍包裹賊抵敵不住

紛紛斬斷繩索棄船下水溺死者不計其數在  
船者盡被殲斃奪得長龍賊船四號燒燬三號  
擊毀西岸賊壘二座奪獲大礮十一尊火藥十  
餘石初四日彭玉麟抵樟樹鎮初七日賊用大  
船自上游放下意圖衝動我營而戰舟與小划  
繼之彭玉麟督同都司孫昌國帶三板十餘號  
前進賊舟退卻進逼臨江河口我軍連環轟擊

賊以小划抵敵而其大者盡退入口內挽縴上行我軍盡奪小划擊斃多賊乘勝衝過賊壘追入內河搶賊糧船三隻拆毀浮橋初九日彭玉麟督孫昌國等至臨江河口攻打賊壘斃賊甚多該逆棄壘逃退入城各水勇登岸將其護牆望樓全行踏毀伏查瑞臨袁三府淪陷吉安被圍西路業已糜爛省城與撫建各府在贛水大

河之東久爲該逆所窺伺幸去臘有樟樹之克  
今春有瓦山之捷賊匪兩次東渡均被我軍擊  
敗水師扼泊樟鎮壘獲勝仗東岸當可無虞口  
內浮橋造成陸師西渡卽當激勵將士迅克臨  
江以慰

聖主睠懷南服之意

曾國藩又奏言正月十八日都司黃虎臣武生

黃之一等分路進攻九江府城行抵東城多方  
挑戰該逆負嵎不出黃虎臣飭哨官李大雄伏  
於左詹榮清伏於右自帶小隊誘敵出城至路  
徑歧隘之處黃虎臣回兵大戰兩路伏兵衝出  
勇氣百倍該逆回奔追至城根奈城上礮石過  
多僅殲二十餘賊當東城接仗之時西門出賊  
三百餘名由接官亭至鳳凰山意圖抄東路官

軍之尾武生黃之一自西突出率弁勇衝入賊  
隊連斃三十餘賊賊遂潰敗該逆復糾悍賊五  
百餘人戰船八號由水路猛撲我軍且戰且誘  
佯爲退走迨與遊擊曾昭麒接應兵近復回旗  
大戰殺賊八十餘名溺水者不計其數此次兵  
勇僅及千人進攻潯城均以佯敗取勝可否獎  
拔數人歸於樟樹鎮案內彙保之處出自

天恩奏八

上諭內閣曰此次水陸大捷著曾國藩卽飭周鳳山等乘勢克復各城毋任久踞都司黃虎臣等進攻九江誘賊出城截擊獲勝殺賊甚多所有出力員弁著准其歸入樟樹鎮獲勝案內一併保奏

十四日

壬寅

胡林翼奏言上年十二月二十七日

賊於城外挖濠樹柵湘後營劉騰鴻帶二哨往



偵賊見我兵不多出旗來圍我兵隨戰隨退以  
誘之添撥六哨一鼓抄襲殺賊甚多嗣因雨雪  
連綿不能出戰羅澤南駐營洪山之南因北路  
爲山所隔懼賊猝來襲營本年正月十二日羅  
澤南移三營駐洪山絕頂爲犄角之勢十三日  
夜李續賓帶兵往偵遇賊於雙鳳山下李續賓  
策馬直進潛分二支包山之趾而及其脊賊敗

羅澤南派兵接應於山之左劉騰鴻接應於山之右斃賊無數夜半收隊十四日黎明大霧劉騰鴻率兵登雙鳳山巔以劈山礮轟擊大東門城中大亂四面開礮以拒之及霧收賊以千餘人縋城而下我兵力戰以拒之賊不能近又於小東門出千餘人來抄我後羅澤南督兵從雙鳳山北以迎之鏖戰良久殪其前鋒十餘人賊

猶力戰如故羅澤南乃從湖之乾涸處分二支以繞賊之左劉騰鴻驅雙鳳山之賊與小東門之賊聚作一處亦分二支以繞其右皆偪至木柵城上之礮以賊未入不敢開四路夾擊斃賊約六七百人生擒二十五名城內見賊敗遽出隊數千從漢陽門繞沙湖之尾來救李續賓蔣益澧都司何紹彩由小龜山直偪沙湖以槍礮

轟擊斃賊最多十八日賊以百餘人猝抵五里墩搦戰我軍按兵不動以百餘勇敢者追至長虹橋賊以千餘人伏於其側我兵退以誘之參將普承堯知府銜唐訓方督勇分路進擊遊擊張寅恭等繼之分三路以攻其伏鏖戰二時之久敵斃其頭目三人賊敗乘勝尾擊殺斃者數百人二十四日大雪初霽四更後賊以千餘人

撲營猝抵營前拋擲火器營中以槍礮轟擊發  
無不中賊大敗棄械而逃墜崖死者甚衆二十  
五日賊隊來撲中營登山拋擲火毬羅澤南令  
左右二哨分路抄出前哨開營迎敵劉騰鴻率  
後營分路繞賊之後賊見我兵出隊乃狂奔其  
旁遁者多爲我兵所殺追至城根賊踰柵繩城  
而上我勇登雙鳳山以劈山礮擊之墜城而死

者無算賊千餘人復捲旗來撲中營我兵之伏者俟其過而截之中營前左二哨迎之前後來擊共斃賊二百餘人二十八日賊由東門而下出小龜山之尾有渡賽湖燒民房者羅澤南乃飭劉騰鴻率後營以救火分中營二哨往堵大東門何紹彩率仁勇堵小龜山鏖戰兩時斃賊二千餘人官軍正欲收隊詎壇角忽出賊千餘

人從隄上以牽掣左營大東門小東門縋城下者直撲仁營賊氣頗悍仁營分三支應之奮力抵禦不少退卻左營見兩路齊至飭勇駐小龜山巔據險以待分二哨繞小龜山而下以截撲仁營之賊乘勢邀擊賊敗由湖汊逃至城根復頓旗迎戰我軍分投奮迅而前賊又敗斬斃約六七百人餘賊皆遁二月初一日賊防我兵進

攻城池欲遏賽湖之水以斷後路以四五百人掘土填橋堯羅澤南飭劉騰鴻督軍隄上率隊轟擊賊不能敵直奔中和門東舊壘冀絕城而上諸勇乘勝尾追作三路包繞城下溝深樁密賊悉陷於溝坑樁籤中我勇火器環擊鮮有脫者賊又以三四千人過鮎魚套橋由八步街衝撲臣飭唐訓方普承堯等督勇至長虹橋迎



敵飭丁銳義等由五里墩渡浮橋以禦八步街之賊賊之在長虹橋者見我兵至施槍擲戰我兵俟其近前始開槍礮以轟之鏖戰二時之久參將葉永泰出湖中遙爲接應賊畏抄其尾乃敗走各營乘勝追之殺賊數百賊之由八步街出者南營向前截之衆寡不敵勢幾不支我兵之戰於長虹橋者懼對岸有矢飭善泅水者踰

鮎魚套援之殪斃賊目十餘人賊敗走初二日  
臣軍與羅澤南軍各出數百人誘賊賊自城上  
見之亦以千餘人縋城而下我兵爭先奮擊鏖  
戰逾時斃賊數十人賊緣隄而走我兵乘勝追  
之殺賊不少水師現在添備火具趕緊催齊臣  
卽日定期會勦力圖廓清以慰

聖懷所有陣亡守備丁懷本千總金品高把總黎文祥

皇朝通志卷之四十二  
三十三

向德明秦裕昌外委蕭得勝胡萬隆等屢立戰  
功奮不顧身深堪憫惻應請

旨飭部分別從優議卹奏入得

旨丁懷本等均照所請優卹

欽定勦平粵匪方略卷一百四十七 丙辰年

二月十五日

癸卯

上諭內閣曰已革都察院左副都御史袁甲三著隨同  
英桂勦辦河南捻匪

同日官文奏言賊匪在漢江北岸搭造浮橋臣  
恐其潰圍而出意圖上竄當經撥兵添紮北岸  
嚴密防勦正月二十六日漢江南岸賊匪潛圖

上竄已革總兵誦欽密遣兵勇分投設伏四更  
時賊大股圍至我軍礮械齊施賊屍枕藉自相  
踐踏溺水死者不計其數誦欽復由上游渡漢  
進攻至龍燈隄賊約數百人纔擁出戰我軍分  
路抄殺賊卽狂奔復殺斃十餘名追至月湖遇  
賊礮船接戰又被我軍槍礮擊回賊復由龜山  
出隊數百人誦欽派兵至小河日見賊船由晴

川關復來我軍開礮擊沈數隻賊勢遂卻二十  
八日夜賊復由水路潛竄我軍縱火燒燬賊船  
數隻餘船悉遁二十九日署提臣楊載福礮船  
由沌口進發副將顏朝斌督兵進攻漢陽南門  
賊堅壁不出我軍佯退至三里坡賊忽開城大  
隊出追我軍折回迎擊楊載福登岸望見親督  
水勇飛奔接應各勇馳至賊方退入城中忽由

西門及龜山下出賊數千分途來犯經李孟羣  
王國才孔廣順楊昌泗督兵迎敵賊殊死戰巴  
揚阿顏朝斌等均從南路趕至抄殺前後夾攻  
斃賊二百餘名賊復出數千人我軍鏖戰六時  
之久賊匪大敗三十日李孟羣等復於西門及  
龍鐙隄兩路力挫賊鋒斃賊四百餘名二月初  
一日漢陽賊在五顯廟對岸搭造浮橋訥欽卽

在該處挑善泅兵勇數十名乘夜攜刀入水砍其緯纜初二日李孟羣趕飭礮船飛駛助戰請欽卽令兵勇分撲賊卡斃賊多名時月湖賊船數十隻出隊接應被李孟羣礮船擊退賊卽竄入卡內王國才馳至七里廟等處先後斃賊甚多查武漢自遭淪陷一載有餘臣由德安進勦以來力攻漢陽大小四十餘戰該逆踞守愈堅



賊數愈衆良由賊踞長江數千里之險並有下  
游武昌興國九江之賊接濟雖軍威大振而兩  
城尙未克復臣惟有與胡林翼隨時商酌設法  
斷江路賊援一面嚴督將士剋期殄滅羣醜以

副

皇上宵旰憂勤之意奏入報

問

十八日丙午向榮吉爾杭阿奏言瓜鎮逆匪自正

月十八等日痛勦後情形甚爲窮蹙潛在金山  
西面夾江蘆葦叢中築壩一道直通便民河北  
岸洲地意圖逃竄二月初一二等日瓜州賊船  
聯檣來鎮暗舉號火瓜鎮之逆併力衝窺初四  
日夜遊擊張汝琳等瞭見西北夾江燈光隱約  
似有船行臣吉爾杭阿恐高資有警卽派知府

劉存厚等帶兵於初五日由鎮江拔隊前赴高  
資該逆筵而走險於初四日夜由金山渡過鮎  
魚套至洲地登岸潛行蘆葦中由西頭架搭浮  
橋渡過黃泥洲江濱偷紮賊壘二座初五日張  
汝琳等出隊往攻該逆三四千人分作數股由  
便民河涉水而過直撲營盤張汝琳等見賊勢  
甚衆卽回營固守正在相持之際適劉存厚等

兵到張汝琳等勇氣倍增與劉存厚等前後夾擊該逆敗回黃泥洲劉存厚張汝琳等亦卽渡河追剿該逆抵死抗拒其由洲地來援之賊愈聚愈多高資港口之拖罾船開礮轟擊力不能及卽派水勇登岸抄襲守備銜劉襄等衝入賊陣斃賊百人賊始披靡劉襄蔣國材亦被槍陣亡初六日該逆四五百人涉水圍撲張汝琳等

營盤另設於便民河濱放火助勢劉存厚督軍  
鏖戰臣吉爾杭阿又派王夢熊等抄襲賊後立  
斬賊首三顆追溺偽總制一名賊俱望風而遁  
初七日臣吉爾杭阿會同署京口副都統綳閣  
親督佐領興福等馳赴高資進剿該逆五六千  
人分股來撲各軍齊出截殺正在酣戰之際臣  
吉爾杭阿望見伊經阿坐馬被賊槍斃譚金常

被賊擊傷勢將不支卽同縹緲帶領小隊馳赴  
東路督飭進攻守備顧維正首先衝入賊隊手  
斬數賊逆賊始衰顧維正亦中槍陣亡東西兩  
路之賊俱被我兵擊潰查高資至下蜀街一帶  
處處可通丹陽臣等惟有嚴飭余萬清等就近  
馳往堵剿先顧內犯以保蘇常至黃泥洲賊壘  
離倉頭等處賊壘祇三十餘里儘上游之賊沿

江下竄下游之賊亦沿江接引則我下蜀街兵  
勇離江數里實有攔截不及之勢臣吉爾杭阿  
現擬在蕪湖等處招募得力勇丁以補兵之不  
足仍一面會商托明阿等乘虛合力進攻以冀  
克復瓜鎮且使黃泥洲之賊不敢更萌他竄之  
念所有陣亡之守備銜劉襄千總蔣國材守備  
顏維正節次打仗素稱得力仰懇

天恩飭部分別照例議卹奏入

上命軍機大臣傳諭向榮吉爾杭阿曰前因金陵逆賊圖援鎮江竄至倉頭鎮等處諭令向榮等迅速攻勦毋任洲地各匪日久占踞茲閱該大臣所奏鎮江賊匪於金山西面夾江築壩直通便民河北岸洲地遂由金山渡鮎魚套至黃泥洲偷紮賊壘竄撲高資吉爾杭阿等派兵接仗雖有斬獲而黃泥洲之賊尙未



驅除傷亡弁兵亦復不少該洲去倉頭鎮三十餘里  
若使上下游賊匪聯絡則該逆內犯之志愈堅沿江  
一帶地方遼闊節節設防徒費兵力惟有扼要衝擊  
使賊不能遠爲一氣以挫兇鋒而圖制勝若向榮吉  
爾杭阿簡派精銳將上下游洲地各賊壘次第掃除  
並遏句容等處內竄之路仍嚴絕鎮江接濟勿稍鬆  
勁至兵力旣無可添調而招募遣勇總須來歷清楚

者方可收錄勿令奸徒濶跡致有貽誤

上諭內閣曰瓜鎮逆匪圖踞高資經此次痛勦已截其  
內犯之路著向榮吉爾杭阿嚴督各路合力殲勦無  
任窺伺陣亡之守備銜劉襄守備顧維正均著照守  
備例議卹千總蔣國材著照千總例議卹

向榮吉爾杭阿又奏言鎮江各營勇多於兵勇  
數旣多勢不能責成一人統帶因思前隨僧格

林沁在連鎮馮官屯打仗出力之員應不乏人  
合無仰懇

皇上天恩俯念江鎮軍營乏員差遣在連鎮等處打仗  
出力人員內遴選敢勇服眾者四五員迅速馳  
驛來營以備委用奏入

上諭內閣曰著兵部傳知僧格林沁在連鎮等處打仗  
出力人員內擇其曉暢營務堪以帶兵者酌保四五

員奏明請旨發往

十九日

丁未

上命軍機大臣傳諭理藩院曰前因逆匪滋擾直境派哲里木卓索圖昭烏達三盟官兵交僧格林沁等統帶勦滅天津等處逆匪前經僧格林沁奏稱該三盟蒙古官兵等素稱忠勇勦匪甚爲得力朕亦早有聞知今河南地方賊匪猖獗殲除未淨正我蒙古奴僕

等乘機出力攻勦以申誠篤之時著理藩院曉諭哲  
里木卓索圖昭烏達三盟盟長等各由該盟挑選精  
銳蒙古兵一千名配帶器械火藥鉛丸等件由各該  
盟派委賢能台吉他布囊管帶卽在該游牧候調其  
王貝勒貝子公等著毋庸親身帶兵前來所有該盟  
兵調取纜鍋帳房等件皆由京豫備

上諭內閣曰前年逆匪渡河北竄特命奉命大將軍惠

親王參贊大臣僧格林沁統帶京營勁旅滿漢官兵  
及三盟蒙古官兵剋期進勦業已悉數殄滅殲擒首  
逆方冀各路統兵大臣愧奮激發迅速圖功俾逆氛  
次第掃除吾民得安衽席乃金陵首逆日久稽誅鎮  
江瓜州尙未克復安徽江西湖北賊蹤肆擾雖捷奏  
頻聞勢已漸蹙而勞師數載兵力漸疲亟應厚集精  
兵以期大舉著內札薩克哲里木卓索圖昭烏達西

林郭勒烏蘭察布伊克昭各盟於所轄四十九旗內  
挑備驍健官兵驍壯馬匹備齊軍裝器械聽候調遣  
一俟秋高氣爽卽當簡派重臣統率南下加以京營  
勁旅滿漢重兵分道出師殄除羣醜諒茲窮寇不難  
一鼓蕩平各路統兵大臣仍當實力攻勦將賊匪占  
踞各城迅圖克復若俟大兵南下始奏膚公遲延觀  
望之罪責有攸歸其各懍之

二十四日

壬子

向榮吉爾杭阿奏言黃泥洲逆匪

於二月初十日渡便民河南岸在高資以上之

蔡家窯地方四出擄掠經臣吉爾杭阿派署遊

擊伊經阿等帶兵馳往奮勇勦殺該逆不虞官

兵驟至村外之賊紛紛逃竄守備周天培卽將

村莊圍住縱火焚燒村內之賊約有二百餘名

盡行燒斃其逃竄之賊經伊經阿等擊殺數十



名斬首十餘顆十一日臣吉爾杭阿意欲乘虛襲取鎮城冀黃泥洲之賊回顧根本不敢他竄當卽密派已革參將師長鑣已革鹽知事張翊國知縣松壽挑選兵勇充作頭敵豎梯爬城並飭綑關等相機策應十二日子刻臣吉爾杭阿親督小隊至虎頭山派令水勇搶搭浮橋二座師長鑣等各帶兵勇負梯過橋拔去賊釘木椿

越過濠溝直抵城下知縣松壽首先緣梯而上  
拋擲火包將城上賊柵焚燒不意賊匪驚覺松  
壽爲槍子中傷登時墜下陣亡同時副將慶文  
等分兵搶上寶蓋山將賊卡焚燬該逆不敢出  
巢僅於壘內施放槍礮抗拒圍攻兩時天已大  
明始各收隊是日接劉存厚稟報高資以上十  
里便民河北岸洲地有逆匪麕聚該洲徑對南

岸之炭渚情形甚爲緊要 臣吉爾杭阿卽刻督帶隊伍馳赴高資旋據探報嚴巷等處之賊因提督鄧紹良紮營六里店不能內犯旬容忽於十二日夜自焚其壘竄至江濱與鎮逆併而爲一 臣吉爾杭阿卽帶同劉存厚折回鎮江軍營一面飭虎嵩林統帶兵勇二千七百餘名駐紮高資一面飛函知會鄧紹良余萬清會同虎嵩

林上下夾擊其自高資至下蜀街三十里之間  
如橋頭炭渚等處皆有賊蹤係通句容丹陽大  
道惟有激厲將士將便民河南岸賊匪逐節勦  
洗淨盡再於便民河北岸洲地橫互築營直至  
江濱與水師聯爲一氣庶可無虞內犯上下賊  
勢仍不通連勦辦方有把握所有陣亡之知縣  
松壽首先爬城中槍陣亡殊堪憫惻合無仰懇

天恩將松壽照同知陣亡例議卹奏入  
上從之

同日

上諭內閣曰福興現署江甯將軍著在向榮軍營幫辦  
軍務

二十五日

癸丑

官文奏言自去年收復德安後回

戈東指極思埽蕩逆氛剋日肅清江漢數月以

來駐師漢上近偪賊巢壘經臣激勵兵勇大小  
四十餘戰總計先後殺賊數千我軍奮不顧身  
受傷殞命者亦復不少而將士勇往之氣未嘗  
鬆懈現仍督飭諸軍三面兜圍日夜環攻奈該  
逆負固日甚賊壘亦隨毀隨修又恃有興國大  
冶武昌九江一帶賊援踵至水師楊載福統領  
十營礮船僅可截賊上游難以分截大江來路

且武漢隔江對峙水陸紛歧頗難扼截現在黃  
孝德安各路皆無重兵該逆被剿窮極豕突狼  
奔潛圖北犯在在尤宜豫防此臣深以攻克漢  
陽較武昌爲急切而荆襄門戶更當兼顧庶無  
北竄之虞也日來該逆屢敗歸巢守之彌固臣  
忝總師干頓兵城下迄今三月有餘武漢兩城  
尙稽克復勞師糜餉實由臣調度無方溺職辜

恩罪無可道惟有仰求

皇上天恩將臣從重治罪以昭炯戒奏入

上命軍機大臣傳諭官文曰前因德安武漢等處先後被賊蹂躪楊霈西凌阿勦辦無功特授官文以督師重任該大臣總統師干自當隨機應變出奇制勝乃遽以調度無方自請治罪當此事機喫緊之際豈容置身事外朕於各路統兵大臣有功者不吝爵賞有



罪者亦自有權衡該大臣惟當激勵士氣設法圍攻以副委任豈得以請罪虛文爲塞責耶現在興國大冶一帶賊援踵至據稱楊載福水軍僅能遏賊上游荆襄水陸紛歧宜防竄突卽當杜絕外援力圖克復漢陽兼顧荆襄門戶並與胡林翼等謀勇兼施聲勢聯絡以期一鼓蕩平毋得觀望畏難致挫三軍銳氣官文又奏言二月初五日副將顏朝斌督兵由

鷺鷥洲一帶進剿直偏賊卡該逆率衆圍撲我軍奮力迎擊斃賊多名當將賊卡焚燬該逆礮船揚帆上援適值楊載福督船出隊將賊船圍擊賊勢不支轉舵逃奔我軍大獲勝仗奪獲大拖罟船一隻燒燬大鳥船二隻奪獲大銅礮十七尊生擒老賊二十餘名燒斃溺斃者無數是日署按察使李孟羣副將王國才分左右隊於

漢陽西門外誘戰賊見我軍列陣直前攻撲李孟羣揮兵迎擊千總劉德榮身受四傷猶手刃悍賊一名軍功范潮蘭又往五顯廟誘賊出戰賊出二百餘人俟其撲近擊之李保邦亦自伯牙臺抄擊而至又斃賊多名李孟羣礮船燒燬賊船三隻並將五顯廟賊卡焚燬初六日李孟羣王國才於漢陽西門橋誘敵賊出二千餘衆

我軍佯退該逆追至七里廟訥依琿阿馬隊首  
先抄擊殺傷多名賊匪奔潰維時漢陽南門外  
顏朝斌楊載福等同時會攻百計誘之該逆江  
面礙船因前日之敗不敢復出岸上賊衆出拒  
我軍旋敗退入卡已革總兵訥欽等在江邊埋  
伏潛分一軍將該逆五顯廟卡牆更樓一併轟  
倒該逆大股由龜山趨至援應月湖內賊船亦

開礮抵禦復有股匪由梅子山衝出我軍先已  
節節埋伏該逆猝不及防驚奔回卡我軍復礮  
斃湖內賊匪十餘名外江賊船聞礮聲趨援亦  
被我軍擊斃無數初八日李孟羣等分途進攻  
該逆堅守城壘直至午後於西門出賊四千餘  
衆分路來撲勢極勇猛我兵嚴陣以待王國才  
等直搗中路該逆首尾不顧勢卽披靡被我兵

殺斃數百餘匪敗遁十二日夜南岸賊船六十餘隻溯流而上李光榮等分坐划船迎擊焚燒賊船十餘隻斃賊多名餘船乘風而遁查該逆疊次受創以堅守爲得計我軍屢抵卡下拔其鹿角焚其木柵均被卡內槍礮所阻傷亡甚多賊卡被燬隨修未能卽平焦灼實深現仍吞會胡林翼分撥礮船陸隊先行截賊青山援路一

面督率南北各軍更番攻勦庶得乘機攻克以  
期一戰成功兩城速復奏入報

聞

二十八日

丙辰

向榮奏言該逆竄踞倉頭顧家場

內犯堪虞

臣

檄令鄧紹良馳抵六里店會同余

萬清妥籌布置迅速進兵該逆連日由山僻小  
路竄越焚掠俱經遊巡兵勇分投擊退二十六

日有賊大股至嚴巷口姚岡築壘鄧紹良會同  
余萬清派隊分路攻撲逆衆憑擁拒戰遊擊李  
定太督軍奮勦鄧紹良與余萬清親督大隊左  
右抄攻轟斃賊匪無算連奪大黃旗多桿賊勢  
不支官軍移營進逼二十七日該逆五六千人  
分路迎拒鄧紹良馳馬督戰被賊礮傷骹膀李  
定太亦被槍傷左頰余萬清催兵奮擊陣斬悍



賊多名斃賊數百餘人該逆復分股窺犯下蜀  
街圍襲營盤被虎嵩林伏兵擊敗二十八日余  
萬清會兵夾勦擒斬多名將賊屯糧房屋燒燬  
三十餘所兵勇進紮和家灣偏攻嚴巷該逆分  
路拒戰鄧紹良親督指揮令千總徐剛等從山  
左將賊要擊先後斃賊二百餘人李定太衝入  
賊隊連斬黃衣賊二名餘逆大潰奔逃二月初

一二等日官軍會攻姚岡顧家壩賊壘斬獲甚多盡將壘外鹿角椿籤焚燬並焚其屯糧之草田二壘餘逆併入劉家莊木瓜村兩壘死守初五日夜復來襲便民河被伏兵痛剿截回該逆以下蜀街六里店勦截嚴密有復向上游由三汊河內犯蘇常之語初八九等日張國樑會同德安秦如虎由三汊河龍潭口進攻賊壘殺賊

二百餘人另股竄至英隆洲屯踞經余萬清田  
宗揚疊次要擊斬馘五十餘名偏溺河港死者  
數十名臣查賊由英隆洲竄踞橋頭旣抄出下  
蜀街之前內犯旁竄在在堪虞臣先調總兵明  
安泰至句容縣堵紮一切城守事宜均已布置  
周妥現在丹陽緊要仍令該總兵馳往設防惟  
兵力甚單臣軍除調出各路外存營不及四千

人該逆大股出竄以來我軍連月苦戰雖斬擒  
逆匪不下六七千衆而我兵受傷亦一千餘人  
探聞上游賊援又有萬餘踵至欲由石埠橋東  
流等處衝竄是賊勢日增日衆我兵愈分愈少  
四顧躊躇左支右絀因函商督臣怡良於江蘇  
籌兵二千名更替扼紮以便抽撥兵力併圍攻  
勦無如急切不能趕到惟有飭催鄧紹良會同

余萬清相機進攻一面令德安張國樑直搗倉頭使賊首尾牽綴不能兼顧十二至十五等日張國樑等兵進攻倉頭該處賊巢六座前後相倚我兵搶撲前壘賊從後壘併夥抗拒又有顧家壩賊眾來援我軍鼓勇攻打轟斃守塚多人立破前壘二座該逆於十二日夜自焚賊巢全燬竄赴炭渚其衝犯龍潭之賊經秦如虎等過

河迎勦殺斃賊匪二百餘人乘勝進攻橋頭並  
躡看紮營地勢現擬移營偏攻分屯東西堰一  
帶總期扼住內犯迅將竹裏廟橋頭炭渚之賊  
併力掃蕩臣惟有殫竭血忱妥爲籌策與吉爾  
杭阿和衷商辦督飭該提督等嚴密堵勦力扼  
要衝以冀仰紓

宸廑所有力戰陣亡之守備董洪升千總彭秀剛額外

陳平川外委吳雲忠懇

恩飭部從優議卹奏入

上命軍機大臣傳諭向榮福興吉爾杭阿托明阿陳金  
綬雷以誠曰該逆自占踞倉頭嚴巷後雖經官軍連  
日痛勦而賊黨愈衆復由沿江炭渚橋頭一帶步步  
築壘延亙洲地至百餘里之遠斷非隨處設防所能  
堵截覽所奏接仗情形將士皆能用命而洲地港汊

紛歧必須水陸夾擊向榮所調怡良兵二千名卽著  
飛提赴營派撥助剿本日復諭知何桂清於浙江防  
兵內酌量籌撥一千或數百名卽可飭交鄧紹良等  
分投堵擊總以力掃賊壘使沿江之賊不能與瓜鎮  
勾連庶可杜其內犯黃泥洲賊匪旣自瓜州繞越竄  
出瓜州賊營必已空虛托明阿等卽不能杜其由江  
邊竄越之路豈不能乘賊空虛力圖克復似此因循



坐視殊屬不知大局著懷遵前旨迅將瓜瓞賊巢剋  
日掃除以分南岸之勢勿事遷延自干咎戾

上又命軍機大臣傳諭何桂清曰逆匪自竄踞倉頭顧  
家壩等處屢圖內犯蘇常漸與下游瓜鎮竄出股匪  
繞越通聯近復探聞上游賊援又有萬餘踵至欲由  
石埠橋東流等處衝竄而向榮一軍除調往各路外  
存營兵不過四千名雖經向榮會商怡良於蘇省籌

兵二千更替扼紮仍恐兵力不敷賊勢日增日衆我  
兵愈分愈少覽所奏情形實屬萬分緊急蘇常爲浙  
省門戶設有疏虞何堪設想著何桂清卽於該省存  
兵及各路防兵內籌撥勁旅千名選派得力將弁管  
帶迅速馳赴向榮軍營聽候調遣如該省之兵實係  
無可分撥亦務須酌量緩急通籌大局調撥數百名  
前往以資攻勦而助聲援

上諭內閣曰逆匪被剿窮蹙時圖紛竄經官軍截剿疊  
勝著向榮嚴飭鄧紹良等合力掃除毋任竄越先後  
力戰陣亡之守備董洪升著從優照都司例議卹千  
總彭秀剛著照守備例從優議卹額外陳平川儘先  
外委吳雲忠均著照把總例從優議卹

向榮又奏言蕪湖石壘餘賊經江長貴督兵堵  
緝布置密嚴正月二十七等日東梁山竄賊至

四合山築壘撲營江長貴親統大隊抄剿斬首  
數十級總兵吳全美帶紅單拖罾等船於正月  
十四日駛近兩梁山山坳賊船數十隻亦揚帆  
前來抗阻我軍開礮迎勦立沈賊船數隻焚燒  
賊糧船十餘隻二月初一日吳全美揮船下駛  
將至四合洲紅單船忽然閣淺吳全美卽抽換  
戈礮拖罾一船於初四日乘風直下攻至兩梁

山沿江掃蕩適副將李德麟分派紅單七船及  
快蟹三隻隨同上勦大通江面初七日風色甚  
順吳全美督船攻擊南北兩岸賊壘風息收隊  
復分撥水勇三百名在江邊紮營助勦聯絡水  
陸聲勢現在江鎮情形喫重若將上游江面扼  
斷賊勢自孤廣東續調紅單等船二十七隻尙  
無到江信息臣擬俟該船到江卽令調赴上游

聞

與吳全美等會同勦洗以期早靖長江奏入報